



Rabu, 21 Desember 2022

Ogen: Heber 4:1-7



Ukur Si Mersik



Raja Firaun salah sada jelma simersik ukurna, la ipelepasna bangsa Israel ndarat i Mesir nari aminna enggo ibahan Tuhan tulah man bangsana. Tulah e sada peringeten maka kai pe banci ibahan Tuhan lako mulahi bangsaNa i Mesir nari. Gegehen ras beluhen akapna ia asangken Tuhan seh maka ipemersikna ukurna, kai pe nina Tuhan la begikenna.

I bas kitab Heber pe isingetken maka bangsa Israel la bengket ku bas pengadi-ngadin Dibata erkiteken ipemersikna ukurna. Enggo ibegina ras iidahna Jesus, si jadi Juruselamat doni enda. Enggo iidahna alu matana jine kai si ilakoken Jesus sedekah IA nggeluh i doni enda. Kai si ibahan Jesus e itulakna, Jesus e jine pe ibunuhna. Jesus anak Dibata e la teralokensa. Ajaren agamana e rusur akapna si payona, ajukna pe kalak sideban lako nulak Jesus. I abs ia nulak Jesus e, em dalan-dalanna la bengket ku bas ingan pengadi-ngadin si isikapken Tuhan e. Sabap Jesus ngenca dalan ku je.

Penulis kitab Heber empersingeti ngawan perpulungen gelah metenget, ola min sada pe perpulungen e gagal bengket ku bas pengadi-ngadin si isikapken Tuhan e. Berita kerna Jesus selaku Juruselamat e enggo ibegi ras ialoken. Sabap enterem kalak enggo erberita, lit si jadi saksi mata peristiwa si ilakoken Jesus bas perdalanen pelayanenna seh ku kayu persilang. Kalak e enggo erberita maka tuhu-tuhu Jesus e me Mesias, si nelamatkan kerina doni. E maka nina penulis e, adi begindu sora Dibata wari enda, olanai pemersik ukurndu.

Enda pe persinget man kerina Moria, gelah tek nandangi Tuhan Jesus e. Ia ngenca dalan seh ku ingan pengadi-ngadin Dibata. Erkiteken si e perlu meteruk ukur, labo ban beluhta entah usahanta kita bengket ku pengadi-ngadin Dibata e. Labo lit kalak si ngasup mabai kita gelah seh ku ingan e. Kebayaken, pemeteh ras kuasa, la ngasup naruhkan kita ku je. Jesus kal ngenca dalan e. Aloken Jesus ras teklah. Tandana kita tek, jera bas kerina lagu langkah.

seh asa wari enda, sora Dibata terbegi denga.

